



# SUSUNAN SAMBAYANG ONTOK SAMBAYANG ROH

(DAAPM KUMPULAN KENE' ATO SABUAH KALUARGA)

*Apabila Sambayang Yukaris nanga' ana' dapat dikarajaan, susunan sambayang ngan doa nyian dinyadiaatn batujuan ontok diri' tarus ana' katingaanan daapm aturan susunan Yukaris lalu tarus bahubungan ngan barakat sarata kakasihatk Tuhan. Nyian sabagai paringatn ka diri' bahawa ia ana' sasuai digunaan ngikut aturatk kabiasaatk Sambayang Roh apabila Sambayang ba Sakramen ana' dapat dikarajaan. Susunan'e nyian mungkin diulu'atk oleh katuha kaluarga ato' pun sape aja' ang dapat ngatuhai' daapm urakng am bakomo' koa.*

## **LAGU ATO HIM MUIH DINGALAGUATN**

*Ato sanyap sakajap*

**Katuha:** Tuhan ang Pangabis bakoasa, Bapa' kami ang di Saruga, kami bakomo' di sia ngadap Kita' hari nyian daapm doa sarata daapm randah hati, muliaatk Kita' ang nangga' nahui' sape Kita' ang sabanar'e sarata pakara ang udah Kita' ngarajaan daapm kaidupatk kami. Kami mare' Kita' tarima' kaseh sarata puji ka kakasihatk Kita' ang kaya', bahawa Anak Kita' pun ana' dingacualiatn uga', sampelah Ia dingantat jaji buis nganti anak biri ontok mati sarata nyalamatatk kami umpat dari dosa, malalui' Yesus Kristus Tuhan kami.

**Samu'e:** **Amin**

**Katuha:** Babarokatlah Tuhan ang + Bapa', Anak, ngan Roh Kudus. Lalu babarokatlah Parentah'e, kania' ngan sa ama-ama'e.

**Samu'e:** **Amin**

**Katuha:** Supaya koasa umpat dari Roh Kudus atakng ka kami, O Tuhan, ang daapm kakasihatk marasihatk ati kami lalu ngalindungi' kami umpat dari samu'e kasusahatk; malalui' Kristus Tuhan kami.

**Samu'e:** **Amin**

**Katuha:** Tuhan am Bapa kami, tarima' kaseh ka Anak Kita' Yesus Kristus ang matakatk:

“Basadialah, Aku badiri di muha pintu lalu nodok ki' kita'. Jikalo kita' nangar suara Ku lalu mukaatk Aku pintu, Aku mao' tama' ka daapm sabaya ngan kita' lalu sabaya-baya makatk ngan kita' lalu kita' ngan Aku.” (Wahyu 3:20)

“Aku adalah puhutn'e, kita' adalah dahatk'e. Sape ang bagabung ngan Aku lalu Aku ngan bala'e, mao' ngaatakngan buah, sabab salain daripada Aku, kita ana' dapat ngarajaan damiamia.” (John 15:5)

Kami uga' batarima' kaseh ka Kita' Bapa, ka kabatoatk sarata kakasihatk Kita' ontok,

“Kita’ nyadiaatn sabuah meja ka aku ba adapatn urakng ang nyusahi’ aku, Kita’ udah nuhang minyak ka kapalaku sarata mangkok ku dinginsi’ik sampelah baisi’. Samemang’e kabatoatn ngan kakasihatn kita’ santiasa nyaratai’ aku sapanjang hari daapm kaidupatn ku, lalu aku mao’ diapm ka daapm rumah Tuhan sa ama-ama’e.” (Masmur 23:5 – 6)

**Samu’e: Amin**

### **BACAAN UMPAT DARI KITAB KUDUS**

*Injil dimaca ngikut daapm pilihhatn bacaan umpat dari Lectionary ngikut hari’e dingalataktn. Bacaan umpat dari Bup Pajanjiatn Ama sarata ngan Epistola muih uga’ dibaca.*

### **KHOTBAH ato BAKUNSI**

*Salapas Injil dimaca diri’ lalu diapm sakajap ontok mikiratn sarata batapakor ka bacaan Injil koa. Conto’e nangaratn khotbah ang udah dingarekot ontok hari koa.*

### **KAPUCAYAATN RASUL**

**Samu’e: Aku pucaya’ ka Tuhan,  
Bapa’ ang pangabis bakoasa,  
Ang nampa’ angit ngan dunia;**

**Aku pucaya’ ka Yesus Kristus,  
Anak Tunggal’e, Tuhan diri’,  
Ia dimuntingan malalui’ koasa Roh Kudus  
Ialu dimaranakatn oleh Maria Andara Bungas,  
Ia dinyeksa daapm pamarentahatn Pontius Pilatus,  
Diukum bunuh di kayu salep, Ia mati lalu dinyubur,  
Ka talu ari, Ia bangkit umpat dari mati, Ia puakng ka Saruga,**

**Aku pucaya’ ka Roh Kudus,  
Ka Eklisia Katolik ang Kudus,  
Ka kabatn urakng kudus,  
Ka pangampunan dosa,  
Ka kabangkitatn umpat dari mati,  
Ka kaidupatn ang kakal sama-ama’e. Amin.**

### **SYAFAAT**

*Susunan kata’e ang diri’ sandiri’ ngalataktn, badoa ontok Gareja sarata dunia, sarata kagunaan diri’ sandiri’ sarata kagunaan urakng lain.*

### **KATA-KATA NYASAL ATI KA DIRI’ SANDIRI’**

**Samu’e: O Tuhan, kami sabanar-banar’e jara’ sarata nyasal ka diri’ kami sandiri’ ang udah badosa ka Kita’ sarata ka samu’e kasalahatn ang udah kami ngarajaan lalu kabatoatn ang ana’ kami ngarajaan. Ampuni’lah samu’e dosa kami sataga Yesus, lalu bare’lah kami kakoatatn sarata kapintaratn ontok ngubah kaidupatn kami, ngikut daapm Kata Kudus Kita’. Amin.**

### **KATA-KATA NARIMA’ PANGAMPUNAN**

**Katuha:** Daapm kasatuatn, Tuhan Yesus am babarakat, ka samu’e ang pucaya am bakomo’ di satiap meja mazbah Gareja Kita, tempat Tubuh ngan Darah Kita’ am babarakat dinyarahatn jaji

buis kania' hari'e, lalu talabih agi' ngingatatn parish kami \_\_\_\_\_ (dama Parish) sarata urakng am basambayang di koa, kami banar-banar mao' mare' puji sarata tarima' kaseh, ka samu'e ang dinampa sarata samu'e kaidupatn nyian ang dimarakati', ka kamanangan panyalamatatn ontok kami malalui' kaidupatn, kamatiatn sarata kabangkitatn umpat dari mati, ka tujuan kakasihatn sarata ngantiatn kamuliaatn.

Ngan talabih agi' ka barakat ang Kita' mareatn ka kami \_\_\_\_\_ (patakatn damia barakat koa). Kami pucaya' Kita' nangga' sabanar-banar'e ada daapm Sakramen Kudus, lalu, kania' kami ana' dapat nyambut kasatuatn nyian, kami badoa supaya Kita' atakng ka daapm ati kami. Kami bakomo' sabaya'atn kami ngan Kita' lalu babahasa ka Kita' sapanoh ati kami, sumangat kami, ngan pikiratn kami. Supaya ana' ada jukut lain ang dapat nyuruh kami bapacah umpat dari Kita'; biarlah kami malayan Kita' daapm kaidupatn nyian, sampelah, malalui' kamaoan Kita' am babarakat, kami lalu atakng ka parentah Kita' am bamulia tingi sarata kadamaian ang ana' bapangujukngan.

Malalui' Yesus Kristus Tuhan kami.

**Samu'e: Amin**

### **DOA TUHAN YESUS**

*Sanyap sakajap ontok batapakor pasal Tuhan ang sabanar-banar'e kasih ka diri' lalu ngantat Anak tunggal'e ka dunia sataga diri', lalu salapas koa ngataatn nyian.*

**Katuha:** Sabab Panyalamat diri' udah ngajari' diri', lalu diri' badoa:

**Samu'e: Bapa' kami ang di Saruga, kuduslah dama Kita',  
Ataknglah parentah Kita',  
Jajilah kamao'an Kita', di bumi aya di Saruga.  
Bare'lah kami hari nyian, kaparluatn kami ari-ari.  
Ampuni'lah dosa-dosa kami aya kami ngampuni'  
kabatn'e am badosa ka kami.  
Amelah nabanan kami ka daapm pancobaatn,  
Tapi bebasatnlah kami umpat dari kajahatn.**

**Sabab nuk Kita'lah pamarentahatn, koasa ngan kamuliaatn,  
kania' ngan saama-ama'e. Amin**

### **PANUTUP**

**Katuha:** Ataknglah Tuhan Yesus, lalu diapm daapm ati kami daapm sapanoh koasa Kita'; bare'lah kami pamane Kita' sarata iringan kami ngikut maraga am batol; tatapatn kaidupatn ngan karajaan kami ngikut rupa kakudusatn Kita'; lalu daapm koasa kabaikatn Kita' ang kaya', bakoasalah ka atas koasa ang jahat ang mao' ngaco sarata ngarusak kamajuatn parentah Kita', ang sabaya-baya ngan Bapa', sarata ngan Roh Kudus, ang idup sarata marentah, satu Tuhan, ang daapm kamuliaatn sa ama-ama'e.

**Samu'e: Amin**

**Samu'e: Barakat Yesus Kristus Tuhan diri',  
Sarata kakasihatn Tuhan am Bapa,  
Ngan kasatuatn Roh Kudus,  
Nyaratai' diri' samu'e, kania' samp'e saama-ama'e. Amin.**